

QUÆSTIO MEDICA.

Quodlibetariis disputationibus manè discutienda in Scholis Medicorum, die Jovis vigesimâ-sexâ Januarii.

M. CAROLO CONTUGI, Doctore Medico, Præfide.

Nocet ne cerebro Tabaci usus?

TABACI nostris in regionibus increbuit usus. Optimatum delicæ, plebeiorum alimentum. Pluribus effertur laudibus à nonnullis, ab aliis contemnitur, sed inconsultè. Illius usus nec nimis laudandus, nec contemnendus. Intempestivus & frequentior varias parit ægritudines, quas pariter concitat vini ingurgitatio. Tempestivus ac moderatus cerebri morbis opitulatur, dum eas, à quibus nascuntur, causas viribus suis amovet. Cerebri vitia à supervacaneo sanguinis sero fieri consueverunt. Hoc sero caput, in perenni spiritu ad motum & sensum necessariorum generatione, impletur. Binæ etenim carotides arteriæ, totidemque venæbrales, cum tenuiorem sanguinem in cerebrum continuò invehant, harumque ramusculi exilitatis infinitè in singulis substantiæ corticalis anfractibus variè inflexi & contorti, advecti sanguinis puriorem, magisque aëream portionem excipiant, structurâ suâ attenuent, & in spiritus puros evēhant, serosa unâ cum spiritibus (quorum vehiculum est,) in cerebri poros introducitur, non rarò copiâ aut qualitate cerebro nocitura.

SERI secretionis gratiâ innumera glandulæ instar acinorum uvæ agglomeratæ totum caput occupant. Glandularum multæ plexus potissimum choroideo insertæ, redundans; serum in cerebri ventriculos velut in materiæ excrementitiæ & foras amandandæ meras cloacas deponunt. Serum non apertos modò canales, sed strictiores etiam nervorum poros trajiciens, ac fibras membranaque tanquam filtri lacinias perreptans, per infundibulum & os cribriforme, in has, quæ oris & nasi concava tenent, stillat glandulas. Hæ non tantum humores serosos à cerebro delapsos, sed etiam à sanguine in cerebrum ascendenti secretos, intra poros suos admittunt. Hoc sanguinis excrementum si retineatur, nec per os, naresque vacuetur, molestissimam morborum cohortem producit, vel cerebro gravitatem copiâ afferens, vel spiritus inficiens, vel utrique afflans putredinem. Si colluvie serosa cerebrum disfluat, capitis dolor, torpor, motûs segnitie, sensuum mentisque stupor, succrescit. Eadem labe si spiritibus aspergatur, somnus vix expugnabilis, apoplexia, vertigo succedit. Humor idem si putrescat phrenitis, mania, melancholia, aliæque animi delirantis ægritudines enascuntur. Tot mala & tam grandia facillè suaviterque elevat Tabacum, humoris vacationem promovens.

TABACUM, Nicotiana, vel Petum, planta est latis foliis, in multis Americæ plagis velut in Brasiliâ & Peruvîâ uberrimè crescens, sed maximo pretio est ea quæ ex Floridâ deferatur. In nostras terras transportata fuit, sed ut minùs calida nostra regio, sic planta minùs generosa prodit. Calida est, tenuium partium, multo sulphure & sale acri abundans, hinc emetica. Fumo enecat serpentes, viperas, aut venis indita, famis, sitis oblivionem, hilaritatemque quandam affert. Largior usus inassuetis ebrietatem velut à meracissimo vino inducit, dolorum plerumque linimentum est. Usus ejus frequentissimus & laudatissimus triplex, vel ore fumus excipitur, vel manditur, vel naribus inditur. Tabacum ore versatum, aut fumus exceptus acrimoniâ suâ palatum ferit, vascula in os serum deferentia pungit, que puncta sese contrahunt, serumque profundunt: quin & serum crassius canales obturans, sale volatili liquat, fluidumque reddit. Hinc copiosa per os pituita expuitur, superfluique cerebri humores absumentur, qui si retinerentur, quanta non parerent mala?

TABACUM in pulverem redactum, gratique aspersum odoribus hisce temporibus & frequentissimè, nec absque comodo naribus inditur. Suavi suo odore cerebrum recreat, aëris malignitati, foetidisque odoribus potenter resistit. Acri sua extergenteque facultate, quæ in sulphure & sale volatili posita est, sternutamentum provocat, quo cerebrum subcutitur, pituitosorumque humorum, & mucis ingens copia educitur. Non tantum cerebrum expurgat sternutamento, sed & pectus. In membranis nasi interioribus quæ excitatur veluti convulsio, diaphragmati nervorum ope communicatur, irritati spiritus in organo olfactûs, violento cum impetu ruunt in diaphragma, quod mirè contrahunt, contractum summâ vi sursum resilit, unâque cum aëre sonituque exploso, ex glandulis & ex emunctis pulmonum vesiculis copiosam abigit & expellit pituitam, morâ non minimam labem pulmonibus allaturam.

TABACO si pituitosus sapienter & modestè utaris, exuperantis pituitæ vacatione multorum radices præscindes morborum. Quàm necessaria cerebro supervacanei seri expurgatio: huic tam utile Tabacum. Non ad Medicos solum usus, sed ad delicias etiam comparatum id est. Sensuum namque organis suæ sunt delitiæ, suæ sunt parata obsonia, atque oblectamenta. Linguam & fauces suaviter irritant mollia vina & generosa, & cum arte paratæ mensæ. Oculi luminis, picturæ, colorumque varietate recreantur. Aures voluptate perfundit dulcis vocum & instrumentorum consensus. Cuti corporum mollities blanditur. Nares titillat Tabacum, at quantâ cum suavitatem dicent ii, quibus usus ejus frequens est & laudatissimus. Apud delicatos homines commendatur velut gratæ suæque nasi epulæ. Apud nos ob eam quam affert cerebro utilitatem. Hujus usu sæpè instantes à pituitâ morbi discutiuntur. Ad soporosos affectus depellendos, obtusos sensus acuedos, infixosque capitis & dentium dolores sedandos, non sine utilitate adhiberi solet; nec dubium est, quin vix quisquam cerebri morbis ægrotet, qui Tabaco utitur.

Non ergo cerebro nocet Tabaci usus.

DOMINI DOCTORES DISPUTATURI.

M. Petrus Paulus Guyart.

M. Franciscus le Rat.

M. Ludovicus Labbé, Pharmaciæ Professor.

M. Andreas Engehard, Professor Regius.

M. Iosephus Thomasseau.

M. Ludovicus Peirier.

M. Ioannes-Baptista Moreau, Professor Regius, & primarius serenissime Delphine Medicus.

M. Ioannes Garbe.

M. Guillelmus Petit, primarius serenissimi Delphini Medicus.

Proponebat Parisiis JOANNES FRANCISCUS FOY-VAILLANT, Bellovacensis, Baccalaureus Medicus. A. R. S. H. 1690.

